

EN IAKOPUJ A KIJIN LIKAU.

¹ IET nai Iakopuj ladu en Kot o Kaun Iejuj Krijtuj on kainok eijok riau, me pakajar pajaner; komail perenda! ² Ri ai ko, komail perenki ma komail lel on kajonejon. ³ O aja, ma omail pojona me pun, a pan kareda kanonama. ⁴ A kanonama pan duedueta lao lel imwi, pwe komail en anla o unjok, o jolar anane meakot. ⁵ A ma amen re omail jota a lolekon, i en poeki ren Kot, me kin kotiki on amen amen ni jo kidaue, ari, a pan ale. ⁶ A i en poeki ni pojona, der peikajal, pwe me kin peikajal, me rajon iluk en madau, me an kin ipir wei pukepuk. ⁷ Pwe i aramaj ender lamelame, me a pan tunole meakot jan ren Kaun o. ⁸ A ol amen me peikajal, kin koweikodo ni a dodok karoj. ⁹ A ri atail amen, me jamama, en juaike a kapwapwa. ¹⁰ A me kapwapwa en juaike a jamama, pwe duen majal en rä a pan monedi. ¹¹ Pwe katipin dakada, ap karakar, ap kamonedi rä kan o majal en rä pupedier, o mom a kajelet olar, iduen me kapwapwa o pan jora jan ni a wiawia kan. ¹² Meid pai ol o, me wonweita ni jonapa, pwe murin a poedi, a pan ale nin in maur, me Kot kotin inauki on me pok on i. ¹³ Ma amen pan jonejon, a depa inda, me a jonejon ren Kot. Pwe Kot jota kak mi pan jonejon en mejued, o a pil jota kin kajonejon amen. ¹⁴ A amen amen kin jonejon ni a inon jueed. ¹⁵ A inon jueed lao wiauier, ap naitikadar dip; a

dip, ni aunjokelar, kin naitikada mela. ¹⁶ Ri ai kompok kan, komail der ponepon kida. ¹⁷ Kijakij mau karoj o a japan kodido jan poa, jan ren Jam en marain akan, me jota man jon toror o jota man wukila. ¹⁸ A kotin kanaitik kida kitail majan melel, pwe kitail en wiala mejeni en japwilim a kan. ¹⁹ Ri ai kompok kan, komail aja, aramaj karoj en madan ron, a pwand en lokaia, o pwand en makar. ²⁰ Pwe makar en ol o jota kin kapwareda pun en Kot. ²¹ I me komail en kajela pwel karoj o me jueud karoj, ap ale on komail majan o, me padedier lol omail nin tiak en karakarak, i me kak on kamaureda nen omail. ²² A komail en kapwaiada majan o kaidin ron eta, a ma iduen, komail kin kotaue pein komail. ²³ Pwe ma meamen kin ron majan o, ap jota kapwaiada, nan a raj on ol amen, me kin kilekilan maj en pali war a nan klaj, ²⁴ Pwe murin a kilekilaner duen pein i, a koie la o pitipit monokela duen a janjal. ²⁵ A me kin kilekilan melel nan kapun unjok o kajaledok, o kapwaiada, o ma a jota pan monokela, me a roner, a kapwaiada, nan i pan pai kida a wiawia kan. ²⁶ Ma amen lamelame, me a kin papa Kot, ap jota kaineneda lo a, o ma a piti pein monion i, nan a dodok on Kot me mal kot. ²⁷ A dodok min o pun mon Kot o Jam me wet: En apapwali japoupou o li odi kan ni ar apwal akan, o pera ki pein i jan jappa.

2

¹ RI ai ko, komail pojon atail Kaun Iejuj Kriituj en linan, der lipiliki aramaj amen. ² Pwe ma ol amen pan ian omail jaraui, me kapwateki rin kold likau linan, o pil jamama amen, me a tuken

likau o jakanekan pan pedelon, ³ A ma komail pan kilekilan me mi nan likau linan, o komail pan indan i: Re kotido kaipokedi met, waja mau, ap indan me jamama: Koe en uda mo, de met impan utipa! ⁴ Iaduen komail lipilipil nan pun omail, o komail wiala jaunkapun kan ni omail lamalam jueed? ⁵ Ri ai kompok kan, komail ron! Kot jota kotin piladar me jamama nan jappa et, me kapwapwaki pojon, o me pan jojoki wei, me a kotin inauki on irail, me pok on i? ⁶ A komail mamaleki me jamama o. Kaidin me kapwapwa kan kin wia jueed on komail o panalan komail mol en kadeik kan? ⁷ Irail jota kin lalaue mar ijou, me komail maranekier? ⁸ Ma komail kapwaiada kapun ijou duen majan o: Koe en pok on men imp om dueta pein uk, nan komail wia me mau. ⁹ A ma komail pan lipilipiliki aramaj, komail kin wia dip, o kapun pan kadiarok on komail, me komail me dipan. ¹⁰ Pwe meamen kapwaiada kapun pon, ap kawela kujoned eu, nan i me tiakedi karoj. ¹¹ Pwe me kotin majanier: Koe der kamal, i me pil majanier: Koe der kamela aramaj! Ari, ma koe jota kamal, a ma koe kamela aramaj, nan koe me tiakedier kapun o. ¹² Komail ari lokaia o wiawia duen irail, me pan pakadeikada ren kapun en kamaio. ¹³ A me jota kin kadek, pan lodi on kadeik apwal, a me kadek, kin juaike kadeik o. ¹⁴ Ri ai ko, da katepan aramaj amen, me pan inda, me a pojona mia, ap jota a wiawia mau kan? Iaduen pojona pan kak dorela i? ¹⁵ Ma ri atail ol de li amen mia, me jolar a likau, o jolar kan ar kijin mana kaukaule, ¹⁶ A ma amen komail pan indan i: Kola

popol raneran o manamana! Ap jota, me komail pan ki *on i*, me mau *on pali war a*, da katepa? ¹⁷ Iduen pojona, ma a kelep o jota wiawia ian, nan a melar. ¹⁸ A ele amen pan inda: Om pojona mia, a ai wiawia kan mia; kajale *on ia om pojona*, me jota wiawia kan mia, a *nai pan kajale on uk ai pojona ni ai wiawia kan*. ¹⁹ Koe kamelele me Kot me ta men mia, me mau, nan tewil akan pil kin kamelele ap majakada. ²⁰ A koe aramaj aklapalap, ma koe men dedeki, me pojona me mal kot, ma jota wiawia kan ian? ²¹ Iaduen jam atail Apraam? A jota pun kila a wiawia kan, ni a pan maironki japwilim a kijin putak Ijaak pon pei jaraui? ²² I me koe kilan, me pojona jauaja a wiawia kan, o pojona unjok kilar a wiawia kan. ²³ Ari majan o pwaidar: Apraam pojona Kot, o i me a pun kilar o a maraneki: Kompoke pan Kot. ²⁴ Komail ari kilaner, me aramaj amen pan pun kila a wiawia kan a kaidin pojona ta. ²⁵ Pil dueta Raap, li jueud amen, kaidin a wiawia kan, me a pun kilar, ni a kajamo men en kadar, o kadar ir ala ni apot al toror? ²⁶ Pwe duen pali war mela, ma jota *nen*, iduen pojona mela, ma jota wiawia kan ian.

3

¹ RI ai ko, me jota mau, ma komail me toto inon ion jaunpadakala, pwe komail aja, me kitail pan lel *on kadeik laud*. ² Pwe pan pak toto kitail kin *japun*, a ma amen jota kin *japunki lokaia kij*, nan i ol melel amen, o a kak koaki pali war a pokon. ³ Kilan, kitail kin *ki on nan au en oj kijin mata*, pwe ren peiki *on kitail*, o kitail kin *kawuk jili war arail pokon*. ⁴ Kilan, pil jop akan! Iraile me kalaimun o

an kin ipir wei, ari jo, men ilil tikitik kak kawuki on waja, me kaptin kin inon ion ia. ⁵ Iduen lo me kokon tikitik eu, a a juaijuai lapalap. Kilan, duen kijiniae tikitik kin ijikada nana kalaimun! ⁶ Iduen lo en aramaj, a rajon kijiniae o aude pan japon karoj. Lo o kijan kokon atail, ap kajaminela war pon, a kin ijikada wiawia en nan maur atail karoj, a pein i ijij jan nan pweleko. ⁷ Pwe jon en man laualo karoj, o manpir, o me karop, o man akan, me kin memaur nan jed, kin kamandala o kaloedi ren aramaj akan. ⁸ A lo o jota aramaj amen me kak kaloedi, nan me juek kot, me dir en men kamela. ⁹ I me kitail kapinaki Kaun o Jam, o kitail kariaki i aramaj akan, me wiauier ni mom en Kot. ¹⁰ Jon ni au ota kapai o karia kin tapi jan ia. Ri ai ko, me jota pun, mepukat en wiaui due. ¹¹ Daduen utun pil pot, a kin ki wei pil iau o jadik jan ni por ta ieu? ¹² Ri ai ko, pik pot pil kak wa wan le, de wain pan kak wan pik? Pil dueta parer jol eu jota kak kida pil. ¹³ Ij me lolekon re omail, o erekila padak? I en kajaleda ni lamalam mau a wiawia kan ni impai o lolekon. ¹⁴ A ma peirin o akamai mier nan monion omail, komail der juaiki palian melel o der kalikame me melel. ¹⁵ Pwe lolekon wet, me jota tapi jan poa a udan pa et, pali uduk, pali tewil. ¹⁶ Pwe waja peirin o akamai mia, nan i wajan jaminimin o dodok juek karoj kin wiauiaui ia. ¹⁷ A lolekon, me tapi jan ni pali poa, maj a kin makelekel, ap pil kaminimin, o kampai, o matarok, o dir en kadek, o wa mau, o jo peikajal, o jo malaun. ¹⁸ A wan pun pan kamoremoredi ni popol ren ir, me kin tom pena.

4

¹ IA waja akamai o pei nan pun omail kin tapi jan ia? Kaidin jan nan omail inon jueed akan, me kin pepei nan omail kokon akan? ² Komail kin inon ion, ap jota aneki, komail kin kamela o kailonki, ap jota, me komail pan ale; komail kin akamai o mauin. A jota omail meakot, pwe komail jota kin poeki. ³ Komail kin poeki, ap jota pwaida, pwe komail kin poeki japon, pwe komail kin kapwaiia kida omail inon jueed akan. ⁴ Komail kamal akan, komail jota aja me waroki on jappa et, kin imwintiti on Kot? Ari meamen, me men kompoke pan jappa, nan i imwintiti en Kot amen. ⁵ De komail kiki on, me puk jaraui majani mal: Nen o me kotikot lol omail, kin inon ion o nantion dodok on Kot. ⁶ A meid laud a mak on kitail. I me a kotin majanieki: Kot kin kotin palian me aklapalap, ap maki on me opampap akan. ⁷ Komail ari duki on Kot a palian tewil, a ap pan tan wei jan komail. ⁸ Kakondak monion on Kot, a ap pan kupukupura komail, kamakelekel pa omail, komail me dipan; o kaminela monion omail, komail me lol riapot. ⁹ Kainjino, o maiei, o janejan; omail kaukaurur en wuki on me mauk, o omail peren on injenjued. ¹⁰ Akitikitik ki pein komail mon Kaun o, a ap pan kajapwil komail da. ¹¹ Ri ai ko komail de lokaia jueed nan pun omail. Pwe me kin lokaia jueed duen ri a, de kadeikada ri a, a kin lokaia jueed on kapun o kin kadeikada kapun o. A ma koe kadeikada kapun, pwe jaunkapun amen koe. ¹² Amen ta jaunkapun o jaunkadeik, me kak on kamaurela o kariala. A ij koe, me kin kadeikada men imp a? ¹³ Iet pil eu, komail me kin inda: Ran wet de lakap

je pan kolan kanim wet o kaujon waja o par eu, o netinet ap kapwapwala. ¹⁴ A komail kin jaja, da me pan wiaui lakap, pwe da omail maur? Pwe komail kin raj *on* tokoi, me kin mi anjau kij, ap mokonaidi. ¹⁵ Mak eta komail en inda: Ma Kaun o kotin kupura, o ma kitail memaureta, kitail pan wiada met de mo. ¹⁶ Ajo, komail kin perenki omail jujuai, nan jujuai due met me jueed. ¹⁷ Ari, melel ta, meamen me lelapok ki me mau, ap iota wia, nan i me dip *on* i.

5

¹ A KOMAIL kapwapwa kan, janejanki o weri-wereki, kampamail pan lel *on* komail! ² Omail kapwa kan olar, o man en mot kanalar omail likau kan. ³ Omail kold o jilper mirelar, ari, ar mir me pan kadede *on* komail, o pan *nar pajan* uduk omail due kijiniai. Nan komail nakier kapwa ni imwin ran akan. ⁴ Komail *nar*, pwain en toun dodok, me kop penaer dipijou en jap omail, me komail kulia janer, kin weriwer; o likwir en jaundolun akan lel *on* karona en Kaun Jepaot. ⁵ Komail ipuepuarok kier me jueed nin jappa, dender *on*, komail kamue matier monion omail rajon man wi, me pan kamela. ⁶ Komail kadeikada o kamela me *pun* o, a a iota palian komail er. ⁷ Ari ri ai ko, komail kanonama lao lel en atail Kaun a pan kotin pwarado. Kilan, jaumat amen kin auiaui wa mau en jap o, o a kin kanonama lao katau en maj o mur moredier. ⁸ Komail ari pil kanonama eta, katene monion omail, pwe en atail Kaun a pwarado me korendor. ⁹ Ri ai ko, komail der pilipil en pan moli ki amen amen, pwe komail ender

pakadeikada. Kilan, jaunkadeik o mi pan wanim.
¹⁰ Ri ai ko, ni omail kalokolok o kanonama komail alale jan jaukop akan, me kokopeki ni mar en Kaun o. ¹¹ Kilan, kitail kin kapina me dadauratar. Komail roner duen kanonama en Iop, o kilaner imwin Kaun O, pwe Kaun o kin kupukupura o kapunlol kaualap. ¹² Ri ai ko, komail kalaka, pwe komail der kaula; der kaukila lan de jappa, o der wia eu jon en kaula; a omail jaben en ei ta, o omail jo en jo, pwe komail de lodi on kadeik o.
¹³ Ma amen re omail kamekam, a en kapakap, a ma amen injenemau, a en kauleki pjalm. ¹⁴ Ma amen mi re omail me jomau, en ukado jaunkoa en momodijou kan, pwe irail en kapakapa kin i, murin ar keie kin i le ni mar en Kaun o. ¹⁵ Ari, kapakap pojona pan kamaureda me jomau o, o Kaun o pan kakelada i, o ma a wiaer dip kai, re pan japedokalar jan. ¹⁶ I me komail en week pena dip omail o kapakapaki amen amen, pwe komail en kelail la. Kapakap melel en me pun amen kin kareda me toto. ¹⁷ Eliaj aramaj amen dueta kitail, a kapakapaki katau ender moredi, ari jolar katau moredi on jappa ni par jilu o jaunipon wonu. ¹⁸ O a kotin pur on kapakap, nanlan ap kamoredier katau, o jap kapareda wa kan. ¹⁹ Ri ai ko, meamen mi re omail, me jalonalala ni melel, o amen kajapaledo i, ²⁰ I en aja, me kajapaledo me dipan amen jan ni a jalonalala, a kamaureda jan mela nen eu, me a pan pwain kidi dip toto.

**Kadede Kap Pjam Akan
The New Testament and Psalms in the Pohnpeian
language of the Federated States of Micronesia (old
translation, using old alphabet)**

Public Domain

Language: Pohnpeian

2014-11-10

PDF generated using Haiola and XeLaTeX on 11 Nov 2022 from source files
dated 30 Nov 2021

1941731f-581e-5815-a2a4-a976cf53af02